

Til Vaksdal kommunestyre

v Ordførar Eirik Haga

Vaksdal kommune

v Rådmann Trine Grønbech

Eksingedalen 26.04.18

Legevakt for Vaksdal kommune

Ut frå kommunestyre-vedtak frå desember 2017 (Kommunestyret - Sak 93/2017), ser me at kommunen arbeider for å få etablert ei felles legevaktordning saman med Samnanger, Osterøy og Kvam i Arna.

Dette vil ikkje vere ei god løysing for vår del av kommunen. Frå Eksingedalen er det svært lang veg til legevakt i Arna, 1,5 -2 timars køyring. Kommunen har lokalsjukehus-tilknyting til Voss sjukehus, og dersom det blir aktuelt med sjukehusbehandling etter legevaktbesøk, må ein då køyre vegen oppatt til Voss. Å få alle kommunane over på avtale om lokalsjukehus på «sprengte» Haraldsplass, er vel heller ikkje vegen å gå – om det er mogleg i det heile?

Har kommunen tenkt legevakt for heile kommunen når dei har handsama denne saka, eller er det kun sett på aksen Dale-Vaksdal? Er det realisme i å få til eit slik teneste til lågare pris enn på Voss, og blir det arbeidd vidare med dette? Ser de i så fall på alternativ legevakt for dei delane av kommunen der ei slik løysing ikkje vil vere forsvarleg eller hensiktsmessig?

Frå Eksingedalen meiner me at det må vere meir hensiktsmessig å arbeide for å få legevakt-tenesta knytt til Voss sjukehus god og økonomisk forsvarleg, slik at kommunen kan halde fram og nytte denne. Denne har kvalitet og er geografisk i forsvarleg avstand frå alle delar av kommunen. Dessutan ligg den samlokalisert med lokalsjukehuset.

Me ber om at desse synspunkta vert tatt med i det vidare arbeid om utgreiing av legevakt for kommunen vår.

Med venleg helsing

Eksingedalen Bygdaråd

V Leiar Frøydis Gullbrå

Kommunestyrevedtak frå des 2017:

KOM - Vedtak: Vaksdal kommunestyre godkjenner ikkje framlagt budsjett for 2018 for interkommunal legevakt frå Voss kommune. Vaksdal kommune gjer gjeldane punkt. 17.4 i samarbeidsavtalen om vertskommunesamarbeid for interkommunal legevakt. Vaksdal kommune arbeidar vidare med å få etablert ei felles legevaktordning saman med Samnanger, Osterøy og Kvam i Arna.